

粵東詩海

〔清〕溫汝能纂輯

呂永光等整理

李曲齋陳永正審定

中山大學出版社



中山大学出版社

責任編輯：衡之
封面設計：方楚涓
責任技編：姚明基

黃少偉
責任校對：鍾永源

ISBN 7-306-01577-X/I·107
定 價：188.00元（全三冊）

ISBN 7-306-01577-X



9 787306 015778 >

〔清〕溫汝能纂輯
呂永光等整理
李曲齋陳永正審定

粵東詩海（下）

中山大學出版社
· 廣州 ·

卷六十六

王佳賓

王佳賓，字用禱，號訥庵。番禺人。清聖祖康熙三年（一六六四年）武進士，官廣州右衛守備。治衛如治邑，以善政稱。佳賓本名家子弟，多才藝，能詩善醫，兼善相馬。武職非其所好，乃自免歸，日與王鳴雷、王隼賦詩為樂。著有怡志堂詩，屈大均序之，謂其治詩如治兵，治兵如治藥，皆以律為之。時以為定論。居城東南鐵爐古巷，圍池亭樹，以梅柳竹梧雜花木環之。施藥行醫，以養其母。母年八十餘尚存，而佳賓顧先母卒。

咸陽懷古

鎬京楊柳為誰春，花萼樓前歲歲新。萬里河源通大夏，七盤山勢控強秦。按歌杜曲花催酒，會飲新

豐月照人。堪笑項王粗莽甚，阿房一炬盡成塵。

李長毓

李長毓，字渭公。番禺人。諸生。著有馬山草。

客中感懷

幾年行止盡風塵，窮海迢迢尚旅人。就乞已無長劍客，倚門應有白頭親。投窮下璧終懷楚，凋盡狐裘未去秦。自笑此身危似葉，不知何地更逢春。

余雲祚

余雲祚，字善將。順德人。余象斗之侄。清聖祖康熙五年（一六六六年）舉人，九年登進士，官湖廣藍山知縣。著有柱史閣初集。

燕臺

居庸關外草芊芊，薊北風橫萬里烟。易水西隨巴蜀去，冀州南與豫徐連。千金市骨誰甘後，一匕環秦爾獨先。聞道幽燕多俠客，風流曾否似當年。

咸陽

葉滿官池草滿墳，當年不識漢家軍。函關未破全嬴沒，坑火方然二世焚。塞外野猿哀白骨，沙丘走鹿傍黃雲。老人圯上三更授，應笑秦王尚好文。

曾華蓋

曾華蓋，字文垣，一字乃人，號喟我。海陽（今潮州市）人。幼穎敏，能文章。清聖祖康熙五年（一六六六年）舉人，康熙九年登進士。潮州鎮劉進忠雅重之。華蓋察其有異志，遁去。康熙十三年吳三桂叛于滇，劉進忠據潮州應之，陰使人招華蓋，不可得。後謁選授浙江壽昌知縣，有善政，行取擢吏部考功司員外郎，轉稽勛司。康熙二十九年典試湖

廣，所取皆楚中名士。旋以同官註議鑄級，歸。年七十卒。著有喟我詩文集。

河口晚望

渡口堪晴望，閑行踏軟莎。夕陽鴉背滿，秋意雁聲多。野樹然紅葉，村籬蔓碧蘿。晚來清吹發，漁笛起滄波。

余錫純

余錫純，字允文，號兼五。順德人。余象斗次子。性慧，幼承家學，能文善詩。游番禺庠，久困場屋，以歲貢任陽江訓導。尋歸，與縉紳名士結社城南，觴咏無虛日。清世宗雍正年間，應總督郝玉麟之召，參與纂修廣東通志。復修清遠縣志。皆詳略有法。終年九十三，猶能書蠅頭小楷。扁舟挈奚童往來村落間，即景成吟，興致不減。終年九十五。著有語山堂詩文集。

秋琴

流水一何動，孤琴心自閑。清商出素手，秋色滿寒山。獨向月明際，悠然太古間。無人知此意，長嘯掩柴關。

秋寺

石徑何人到，霜鐘下界通。水流蒼壁上，僧老白雲中。落葉非無木，空山自有風。誰知方丈裏，終夜一燈紅。

秋獵

秋獵黃山下，旌旗捲落霞。馬飛風在樹，鷹擊兔盤沙。躡武天心厭，非時故老嗟。將軍不掩獸，歸及夕陽斜。

題羅雨三貢園快亭

扶杖不登樓，橋橫杜若洲。孤亭三面水，高竹四時秋。拔地如浮島，凌空似泛舟。忘機堪共隱，盡日不驚鷗。

送沈子敬入都

漸老知游苦，思鄉每越吟。一年南北路，萬里弟兄

心。柳帶朝烟重，江波夜雨深。前途堪寄咏，何處可追尋。

送宋東來歸吳興

舊游相憶野塘邊，春雨陰陰萬壑烟。歸去西湖才幾日，重來東粵又三年。江楓夜落魚爭港，蘆雁寒喧水上田。北嶺蒼蒼空遠望，中流帆影入長天。

宴集雨花洞予曾寄居于此

廿年相對意逡巡，臺榭依然氣色新。旅雁豈忘栖宿地，秋花曾笑亂離身。微霜覆石寒侵袂，老樹依山影過鄰。旬日杯盤三醉此，高歌還似舊時春。

黃士龍

黃士龍，字非潛。花縣人。孝友篤學，舉清聖祖康熙十一年（一六七二年）鄉薦。花縣先隸番禺，從化界多寇盜，自明季以來，屢屢征剿無效，民多逃亡失業者數十年。有貧而被掠者，士龍出金贖之。倡議于鄉曰：此地嶂密箐深，非設縣理之，盜終

不止。遂陳請建城。官從之。士龍仕蒼溪知縣，簡賦恤民，興學育士，有政聲。卒于官，囊無長物。祀鄉賢。著有北山堂集。

任榛

秋夜望月懷遠

月白林葉稀，徘徊見孤影。四壁寒蟬鳴，使人不能靜。殷憂復幾許，露重天氣冷。徙倚望星河，無言空耿耿。

獨坐

獨坐一窗幽，蕭蕭風送秋。天空頻過雁，客久欲更裘。痛飲不辭醉，高吟那得愁。閉門惟自賞，山色滿江樓。

學圃

園林春事足，一望盡扶疏。綠樹皆啼鳥，青山半入廬。地饒思學圃，性拙懶歌魚。向夕西風急，無勞更卜居。

初歸

任榛，字肇楚，號大雁。新會人。任清漣之長子。附貢生。著有蕤園詩草。

異地久為客，故園今日還。草生深巷靜，花落小亭閑。鳥性惟依樹，雲情只在山。無才甘自分，長此閉柴關。

江門夜泊

旅宿江門下，蒼茫當暮天。寒蟲鳴露草，秋月破江烟。人雜他鄉語，燈明兩岸船。自憐才一月，三宿此洲前。

玉臺寺作

夜宿僧留即偶停，上層蘭若倚巖屏。心同爐火烟銷盡，身坐繩床眼便醒。谷靜時聞花落石，山空惟見月當樞。昔人已去禪猶在，正對前峰一片青。

郝瑗

郝瑗，字瑗卿，號龍溪逸叟。番禺人。著有淇園詩草。

上戍樓。

宿峽山寺

家園何處是，生事水雲隈。日暮三湘舸，天寒五嶺梅。我身成野老，形勝半餘灰。今夜忽來此，心從古殿開。

小圃梅開有懷羅仲牧

美人何處所，相望杳難通。路憶三山外，心懸一水中。暗香沉几席，古韻寄絲桐。獨自披襟對，迢迢江上風。

秋航

澄江淡無際，碧水滿平湖。野岸維衰柳，青烟出淺蘆。鷗隨輕浪渺，人共片雲孤。一葉長江外，秋心靜到無。

林璇

林璇，字本茅。番禺人。太學生。著有松坡堂稿。

譚朝璉

譚朝璉，字瑜臣。番禺人。諸生。著有淡如堂集。

秋塞

玉關千里外，寒迴晚風幽。上將陳三略，征鴻度九州。殘陽衰草道，微月遠天秋。漢使南歸後，何人

月夜舟中聞笛

明月滿江城，蘭舟四望平。落梅何處所，孤客不勝情。風起寒潮疾，星飛遠岸明。踟躕還悵望，江上有餘聲。

七夕感懷

銀河寂寂海天秋，乞巧人家盡倚樓。花舸廿年風雨夢，鵲橋幾度亂離愁。滿溪明月光仍在，一望浮雲暗欲流。遙憶素懷無覓處，擬將心事問牽牛。

崔文衡

崔文衡，字行重。番禺人。太學生。著有涵虛亭集。

題楊氏山莊

春城三里外，亦自有山家。傍竹成籬巷，耕田種豆麻。圃深新燕語，徑轉夕陽斜。一種羲皇事，柴門閉落花。

再訪不公不值

精廬冬日過，頻為憶高風。飛錫原無定，看山不與同。凍雲虛閣白，疏樹晚江紅。正好和佳什，叢蘭待遠公。

衛王圖

衛王圖，字昭有。番禺人。太學生。

獨坐

無才終是老風塵，綺閣間看夢裏身。池上藕花將結子，檐前乳燕解迎人。春來共見青山好，亂後驚多白髮新。坐久不須憐往事，夜深明月自為鄰。

鄧運生

鄧運生，字容庵。南海人。諸生。著有邕遊草。

相思洲晚泊

日暮滄洲上，停橈傍淺沙。鳥聲過碧落，螢照亂蒹葭。島暗疑藏雨，雲蒸欲變霞。相思今夕夢，應不到天涯。

望月懷遠

夜色淒如此，蟲聲亦可憐。池平初睡鴨，風細欲吹蓮。醉飲為今夕，幽懷憶去年。一從林外別，孤月幾回圓。

黃璉

黃璉，字伯瓚。順德人。官至州同。著有西園匯稿。

春日過友人齋中分賦

共過草堂上，高人戶半扃。高空雲盡白，曲澗水全青。古樹添新葉，春花護小鈴。此生閑亦得，瀟灑在幽亭。

梁善長

梁善長，字元叔。番禺人。清聖祖康熙十四年（一

粵東詩海卷六十六

黃璉 梁善長 吳筵

六七五年）武舉人。著有倚桂堂集。

送玉泉上人還匡廬

廿年慣住匡廬頂，一杖何期返故林。滄海不留孤鶴影，閑雲偏逐遠山心。半帆細雨江風冷，萬里離懷春水深。我亦蠡湖將取道，高峰能否許相尋。

吳筵

吳筵，字希獎。番禺人。清聖祖康熙十四年（一六七五年）舉人。著有解纓軒稿。

夜登樓

落魄江湖意，登樓暮夜情。雲垂平島暗，月上太虛清。魏闕徒心事，高陽獨酒名。仲宣離亂後，歸思滿江城。

歲暮答邵伯游

傭書忽十載，又欲見江春。映水漸雙鬢，看雲笑一

身。酒疏方覺病。歲暮始憐貧。此日艱難意，深知累故人。

寄余廣文

會後傷蓬轉，誰先解芟衣。心嗟前日別，事與故人違。砌月聞蟲唧，庭秋見葉飛。無聊才子意，應莫笑官微。

鄭際泰

鄭際泰，字德道，號珠江。順德人。家貧好學，弱冠補番禺學生。清聖祖康熙十四年（一六七五年）中舉人，明年成進士，選庶吉士。派習滿文，授檢討。吳三桂亂平，請歸養母。十年母歿服闋，乃入都供職。與修三朝實錄。康熙三十三年分校禮闈。康熙四十四年召對廣東糧米事，稱旨。擢吏科給事中，際泰館選三十年，恨不能陳達民隱，及居言路，時以拾遺補缺自期。尋奉諭辦事史館，纂修大清一統志。以病告歸。里居二十年而卒，年七十有

五。

舟過石龍望羅浮山寄華首臺塵異大師

撲面風塵覲面山，洞天翹首有無間。神仙可望不可即，吾道有忙須有閑。大藥已成丹竈冷，小乘無奈石頭頑。老人端坐飛雲裏，何日尋師扣竹關。

鼎湖雜咏

巍峨大好山，坐斷人我境。還卻草鞋錢，直到孤峰頂。

口曰山路遙，息肩問樵豎。指點綠陰中，閑雲自來去。

古鏡住空界，波光搖淺堤。不勞旁指注，得兔已忘蹄。

頗怪住山翁，鑿破青峰壁。拏雲補太虛，遂與紅塵隔。

潛龍睡未醒，狂龍驚欲起。猛然風雨聲，瀉下天河水。

菩提本無樹，選佛且逢場。誰能花雨外，領界木樨

香。

塔影空金界，香風繞法筵。聞塵歸寂寞，鼻孔得撩天。

陳王猷

陳王猷（一六六三—一七三〇年），字良可，號研村，又號烈齋、息齋。海陽（今潮州市）人。陳衍虞次孫。清聖祖康熙二十年（一六八一年）舉人。初官曲江教諭。康熙五十六年改連州學正。清世宗雍正三年（一七二五年）遷肇慶府學教授。所至講經史，明禮義。士負笈從者，廡舍為滿。卒于官。生平篤學力行，敦友誼，濟困助喪。文章淹雅，尤工詩。沈德潛國朝詩別裁集稱其排界似韓、縱橫近蘇。著有蓬亭詩文集。

薄暮仁化放舟夜抵丹霞山下

挂席背斜陽，亂流倒山影。江靄生茫濛，嶺雲翳昏

暝。遵渚折回灣，燒燭導前艇。篙工怯宵征，詎為發豪猛。龍蛇大澤藏，鸛鶴高林警。窈冥飄海桴，勢遣群物屏。星辰隱見間，天地杳孤迥。暗崖泄奔湍，夜氣積陰冷。栖泊烟水深，已近招提境。

由方丈右轉上海山門

飛樓倚嶽岑，環回覺路塞。四望窮躋攀，斗絕石痕辟。窺天剛半綫，拔地乃千尺。鬼斧鑿何年，儼有巨靈跼。雕鶚駭嵯峨，猿獼防仄窄。當茲斂神魂，直上緩登陟。鐵絙右鈎梯，手腕參足力。左顧窅然深，湏洞曠以黑。納趾踵外垂，高尻面內迫。神人御風行，中道尚栖息。況在塵世間，寧有次仲翮。我幸及其巔，餘喘定顏色。出險憑虛無，扶筇恣游歷。下視蹲群峰，凌亂此一擲。

洗國幹

洗國幹，字三山。南海人。清聖祖康熙八年（一六六九年）舉人，康熙二十一年成進士。官湖州知

府。

游海珠寺

穩睡驪龍夜不驚，擎波爭似御風行。千重蜃氣空中結，十丈蓮花海上生。水闊盡容天浩蕩，秋高時愛笛淒清。何人載鶴橫江去，遠渚孤蒲月自明。

疑仙疑鬼駕空靈，開鑿何曾借五丁。潮勢急從天上落，梵音疑向月中聽。虎頭拍岸晴沙捲，鰲背張帆破浪腥。河伯近來新娶婦，遠山螺髻一時青。

雷奔電掣撼孤城，風雨年年長石鯨。僧鑿半扉容客入，樹剗空腹見雲生。千江夜落魚龍出，萬里烟消笙鶴鳴。我欲乘槎邀博望，歸來載石問君平。

水晶樓閣玉簾屏，海外珊瑚世外稀。樹瞰游魚枝上出，天圍高鳥鏡中飛。弄珠神女風鬟去，入市鮫人寶篋歸。莫謂扁舟牛渚客，夜深燃火事全非。海中方丈構禪居，穩坐洪濤讀梵書。塵世豈能消浩劫，金輪原自住空虛。天清氣象浮員嶠，地折東南注尾閭。未信江河今日下，狂瀾早已奠坤輿。

浩翰西來萬派收，君山一點鑒中浮。馮夷擊鼓風濤立，柳毅傳書渚殿秋。僧放夜燈浮水面，龍拖匹練白雲頭。從來天外夸形勝，不道人間有十洲。

劉世重

劉世重，字仰山，一字任遠。香山（今中山市）人。清聖祖康熙二十三年（一六八四年）舉人，官行唐知縣。以內艱歸里。時有權邑令者某人勾結大吏，盤剝地方，民多怨言，世重竟以言事被累，冤死獄中。世人頗有為鳴屈者。世重所著有東溪詩文選、振綺堂集。

望羅浮

逆浪偃輕席，名嶽忽展眺。舟行快濡遲，所歷涉幽妙。遙峰界天昏，飛巖侵雲峭。想見瑤石臺，高人肆清嘯。心賞蓄十年，始得杖林嶠。尋當問臞仙，靈笈領丹要。

自洞口登山至寶積寺作

陰壑積雨氣，宿霧障前谷。是日天始霽，雲光散高麓。老衲導厓路，古樵指巖屋。勇步凌榛莽，稍稍出林木。幽花隕雜明，哀狖悚魂目。超然發野興，荒寺投茗粥。斑藓佛迹盤，翳獐虎巖矗。四壁迴虛靜，月籟生幽獨。且息登頓勞，早起戒僮僕。

冲虚觀

石壁下林莽，翠色入天靜。遙睇雲木佳，洞壑開蘿徑。丹竈草花茸，藥池日影正。緬想咸和初，真人勾漏令。掃石結精宇，煉液垂金磬。至今緇黃流，巋焉仰清淨。側聞朝斗壇，神物歸僧定。千年銅龍魚，堅光赤玉瑩。摩挲古法器，焚香肅起敬。山衲留茗款，松月發高咏。

合掌岩

荒巖聳攢棘，絕磴隱山魅。傳聞古真人，朝斗此游戲。古人不可逢，攀陟開塵思。萬象森耳目，天風養寒吹。靜然松蔦徑，向暝心魂悸。谷發無人響，潭飛有影翠。奮策循石崖，就宿黃龍寺。

寓懷

龍門百尺桐，上有鸞至止。豫章合抱木，實充梁棟庇。黃金臺焉存，延英閣已矣。范睢竄秦庭，伍員乞吳市。古來識時傑，懷寶良有以。千金求舞姬，五斗厭君子。此意分厚薄，何由激賢士。去去摩霄鵬，扶搖九萬里。

嬌鶯鳴柳條，鮮花百樹芳。少年游俠子，結客上河梁。金鞭掣紫騮，玉劍抽素霜。高引瑤池液，倒持明月觴。醉攜劇孟歸，暮與侯嬴將。千金不一顧，意氣凌八荒。嗤彼鄒魯儒，白首事文章。抱膝窮廬下，老死名不揚。不見揚執戟，投閣良可傷。

泊頭登岸

秋屐辭江滸，烟筇接洞門。馬聲欣夕霽，花氣向山繁。木杪生微徑，藤梢入古村。曜真峰四百，何處問仙源。

嘯廬春思

市橋通白石，望不斷青洲。瘴海聞歸雁，邊田見放牛。驪龍終抱窟，鴻鵠會橫秋。杖畫燈明裏，寒生

雨一樓。

南還與陳謂子話舊有感

翻笑天南客，依依共北征。薊門君八上，燕市我重行。江舸燈殘夜，春泥馬首情。何當還鍛羽，歸思總如冰。

陪馬將軍游香林寺

將軍連騎出高牙，野服行秋犯日華。十里寒原通古寺，四圍山色抱人家。吟移竹簾橫深樹，坐愛松風送晚花。不是羊公能緩帶，勝游多恐負烟霞。

舟入羊城擬訪梁藥亭太史

海角陰垂欲雪天，敝裘還放五羊船。櫓聲驚出柴門犬，帆影斜侵島樹烟。南浦待尋嚴叟釣，東山猶遣謝公眠。停橈便問清華侶，吟斷奚囊白玉篇。

上巳日余殿綸何也晏自博野至都門客舍作

游客頻年滯北河，他鄉相遇喜同過。才華不數唐書記，觴咏還追晉永和。屋角古松吟細雨，牆頭纖月挂新蘿。故人把酒談歸計，盡醉燈前幾嘯歌。

朱明洞

冲虛觀北朱明洞，嶽麓真人舊掩扉。寂寂寒潭誰洗藥，離離仙蝶想遺衣。松聲一派流雲響，野色三更浸月微。試訪葛洪煉丹處，玉芝瑶草帶烟肥。

卓錫泉

高僧曾此留飛錫，一竇靈泉應錫生。清可照天無色相，淡能涵月有虛明。崖前雨過苔衣淨，洞口風回蝶翅輕。待挈銅瓶煎墮葉，黍珠樓下聽經聲。

黃龍洞

檜柏陰森洞宇寒，上方魚磬落雲端。天華夢冷傳南漢，道士松高訝斗壇。十里石梁通翠嶂，九霄靈御渺青鸞。紅爐歇盡金砂氣，剩有黃龍水石盤。

澳門

窮島陰厓有浪痕，銀樓粉閣自乾坤。番童夜上三巴寺，洋舶星維十字門。斜日聽鐘才早供，妙檀羅拜又黃昏。思傳六籍敷文治，令識天朝禮教尊。

虎涌

石梁沙路繞溪明，九曲回流凍有聲。出壑亂雲當

晝合，入天群雁隔江鳴。水芹雪後才舒葉，山菊冬餘始放英。欲向南訛占氣候，四時花木總春榮。

羅浮百韻

勝境饒吳越，名山最益梁。洞天虛古棹，福地限游韁。近挹羅岑峻，遙臨粵嶠長。浮峰渾合影，蓬島半來翔。巖嶠朝羣巘，芊綿亘大荒。雙靈森並峙，巨壑鬱相當。直莫長離位，橫濱牛女鄉。乾坤騰氣象，呼吸沸滄浪。虛籟千叢發，回飆萬騎驤。丹梯扶日月，疊障閼陰陽。氣迴岷峨接，源深勾曲藏。聚霞何奕奕，飛瀑更泱泱。鹿嶺升磅礴，龍隈辟混茫。攀蘿披邃谷，捫磴陟高岡。遂入無人境，旋依古道場。老僧迎皓髮，童子侍清揚。的皪巖花媚，蒙茸雪蕊香。延祥悲廢寺，寶積禮空王。佛潮開元舊，泉探景泰芳。戒壇餘鐵像，貝葉耀青絳。緬邈都虛址，徘徊廣莫廊。魚龍殊玉質，鸞鶴乃霄颺。縱目朱明外，搜奇丹竈旁。衣冠猶蛺蝶，松竹自笙簧。經始從勾漏，重修建葆光。咸和成往蹟，天竺至今詳。御簡亭何在，真人閣已亡。藤梢通一綫，

榛莽豁中央。井里茅茨萃，田廬鉅艾忙。美人空佇立，幽夢想荒唐。鷄黍煩遺老，村醪具折鐺。松風聊偃仰，梅月足徜徉。積葉填頽徑，繁英覆短牆。林巒供遠矚，溪徑渺難量。夕憩紺宮冷，晨興白露瀼。虎巖還躡屨，劍石故攜筇。杞菊扶衰物，菖蒲養正方。行行隨蠟屐，采采及新涼。赤喙看鸚鵡，彤雲指鳳凰。冬葵交白角，南燭翳青羊。孤塔凌雲聳，中宵見日常。層城瑩阿耨，曦景浴扶桑。絕壁窺天險，懸崖帶曜僵。振衣三界得，抗首七星將。越澗仍躡步，循溪或褰裳。藥槽歸翠鳥，符竹鎮蛇狼。小圍營坡老，閑園陋辟疆。秀芝恆五色，喬木每千章。鮑守雲邊舄，安期醉後觴。麻姑曾振佩，玉女復鳴璫。觀宇淪荆棘，精籃占野裳。蘭榮抽露本，笋茁吐烟槍。公子思如結，先生喜欲狂。清芬矜滿袖，甘脆藉充腸。奮往金沙路，迤邐藥市坊。黃龍南漢殿，紅玉列仙糧。挂臂聞猿狖，爭林見豕麋。物華驚錯愕，土植訝輝煌。瘦滑桃榔杖，葳蕤玳瑁床。文禽登翡翠，彩翼失鴛鴦。竹箭寧差等，

元龜豈頡頏。樂材桐梓並，藥味芷苓相。卉以朱茅貴，機宜白葛良。離離金綿紫，若若御柑黃。異果連京洛，奇珍怪狄羌。荔枝攢絳實，龍眼蘊瓊漿。登頰檳萸赭，祛痰桂蠹蒼。歲時喧楚估，迢遞塞吳艎。況是維摩室，而躋般若航。旃檀開淨域，法雨蔭璇房。世界諸緣盡，神休百族昌。玄冥司澍澤，祀事著明堂。帝子祝融宅，諸侯鴈鷺行。夙勤天子命，時舉咎氛攘。奔走金龍燦，祇承玉版張。國家欽祀禱，嶽瀆介宗訪。宣室南山獻，豐年福兆臧。千秋懸醮典，奕祀儼趨跄。未擬泥封盛，終夸覽眺強。憑虛窮窈窕，投策息篋簞。恍遇逍遙子，如逢抱朴郎。草跌才一瞬，烟語詎能忘。野闊雲初散，風清日正陽。鐵橋尋木客，瑤石叩金閭。此地原仙窟，茲辰屆肅霜。思山卑岱霍，觀海小溟滄。樹抹浮沉靄，晴飛縹緲檣。郊原紛歷亂，岷嶸互低昂。夜靜傳仙梵，秋高響穴蟻。石門開石鼓，天寶落天潢。柳拂談經座，花沾拜佛床。雲疑排五嶺，川欲控三湘。酒熱呼張旭，詩成憶謝莊。倦來頻徙倚，

興劇轉徬徨。霞賞收冥奧，山餐煮蕨芒。只堪謀茗碗，不必繫莢囊。汗漫遺塵鞅，登臨得大綱。遠游冠自好，東郭履何妨。久蓄尚平願，行為五岳裝。會須同許碣，蚤晚遍衡匡。

溫槐應

溫槐應，字聲友。東莞人。清聖祖康熙二十三年（一六八四年）舉人。

雜憶

瓊樓謫去別仙家，虛向人間惜歲華。舊曲彈來弦欲咽，洞簫吹徹月空斜。春愁冉冉章臺柳，碧血年年帝子花。話到青衫知盡濕，不須惆悵聽琵琶。風雪蕭蕭馬去遲，海棠花謝負歸期。漫捐紈扇歌桃葉，曾上芳樓聽竹枝。雲髮未梳爭撲蝶，練裙才試倩題詩。無因夢說當年事，揉碎春愁比亂絲。